

Ngoenzgonq Ngoenzneix Mbwn Caeuq Namh

□ Yiz Ciz / 余 执

Sai:

Gvaq gwnz haenz bae ndek,
Haeux lez dek laeng go,
Gaem gyaj sanqsoso,
Gogo cungj baenz haeux.

Mbwk:

Gumq cix sienqlitlit,
Ndit caiq remj baihlaeng,
Ndit ndat hanh cix daengz,
Baihlaeng yaek dai manh.

Sai:

Seiz reihnaz daengz ranz,
Ganq liux cix ndaej naengh,
Ngoenzlawz nditndat haenq,
Mbaenqlawz hix mbouj bae.

Mbwk:

Gaxgonq guenj haeuxnaz,
Mbouj rox maz gohyoz,
Gohaeux daemqbobo,
Gag dainyoj roengz namh.

Sai:

Seizneix miz gohyoz,
Raeuz rox yungh couh ndei,
Ranzranz cungj baenzmeiz(miz),
Haeux ndei gwn mbouj liux.

Mbwk:

Gaxgonq baez sou haeux,
Gangj daeuj caen sim'in,
Gohaeux caij lajdin,
Naedhaeux sinz roengz namh.

Sai:

Gihgi daeuj daj haeux,
Raeuz bouxboux cungj angq,
Raih naz caiq naeuz gvangq,
Ngoenz ganq ndaej geij doengh.

Mbwk:

Ngoenzgonq sez souhaeux,
Ngaem gyaeuj gvej mbouj dingz,
Sou haeux daengz banringz,
Gangjvah sing mbouj ok.

Sai:

Gihgai bae dajsou,
Haeux gag lae roengz daeh,
Fad haeux mbouj yungh faex,
Ngoenz ndaej geijcib raih.

Mbwk:

Gaxgonq aeu fad haeux,
Hanh dumz gyaeuj dumz rwz,
Rauheiq lumj duzewz,
Swz lumj yaek dai mingh.

Sai:

Seizneix caen ndei lai,
Gihgai fad couh ndaej,
Song fwngz bwnq haeujbae,
Naed haeux laecaca.

Mbwk:

Aensangz banz bu law,
Dawz umj haeux cix fad,
Song faj ga baez cab,
Swz lumj naeuz bag fwnz.

Sai:

Seiz sou haeux mbouj gyaih,
Gihgai mbaenqmbaenq meiz(miz),
Ciuh seizneix caen ndei,
Ra yiengh beij mbouj cawq.

Mbwk:

Aensangz nyengq bu law,
Dawz umj haeux cix fonj,
Raih haeux fad geij donq,
Doxgyonj ndaej saek loz.

Sai:

Yungh gihgai daj haeux,
Daeuj lumj raemxdieuqdan,
Geij boux vunz daeuj bang,
Raeuz cang daeh mbouj gib.

Mbwk:

Gaxgonq yaek bae haw,
Cawj souhsaw dwk mbaij,
Bohmeh ngaenz mbouj daih(lai),
Daiq bae riengz guh ringz.

Sai:

Seizneix raeuz bae haw,
Miz ngaenz dawz dwk daeh,
Yaek gwn maz cungj ndaej,
Sawj ngaenz sim mbouj in.

Mbwk:

Mbaij souh fouz fa goemq,
Haeu soemj youh haeu yai,
Mbouj gwn iek yaek dai,
Mbouj lau vunzlai lwnh.

Sai:

Seiz miz ngaenz ndaw daeh,
Saej(sawj) geijlai mbouj in,
Ngoenz bae haw gwnringz,
Noh imq laeuj hix doh.

Mbwk:

Seizgonq raeuz bae haw,
Ngeix dawz genxlele,
Bae haw mbouj miz ceh(ci),
Boux deq boux byairoen.

Sai:

Seiz yaek ok bakdou,
Bae youz hix naengh ceh(ci),
Mbouj dwg lumj ciuhgeq,
Boux deq boux byairoen.

Mbwk:

Seizgonq raeuz bae haw,
Dawz hazraeu bae riengz,
Doxbuet bae' ndiengndieng,
Ndaemndieng laemx geij baez.

Sai:

Ciuh seizneix ndei lai,
Vunz fatcaiz cawx ceh,
Bae haw cawx gaen nyeq(noh),
Ndaej naengh ceh dauq ranz.

Mbwk:

Gaxgonq byaj roenny,
Uq namh daengz gagoek,
Caiq bungz daengz fwn doek,
Ndaek lumj gaeq doek daemz.

Sai:

Seizneix raeuz bae haw,
Ci dawz raeuz baedauq,
Byajraez fwn doek laux,
Aen mauh hix mbouj dumz.

Mbwk:

Seizgonq byaj roen bya,
Oen daep ga raeuz lwed,
Dawz rap caiq doxbuet,

Bae lumj hwet yaek gauz(geuz).

Sai:

Goengloh doeng daengz mbanj,
Gag ranz gag cawx ceh(ci),
Ndaem lgwmanh lgwgve,
Miz ceh bang raeuz yinh(hoehn).

Mbwk:

Dawz rap byaj gvaq nya,
Dinvaq rengqrere,
Dawz rap byajjeye,
Noksej lumj yaek gauz(geuz).

Sai:

Mbanjmbanj byaj roen bingz,
Lumj Baekging Sanghaj,
Miz ci doz raeuz byaj,
Maij bae dauq mbouj you.

Mbwk:

Yaek bae haw bae mbanj,
Ganq diuj gen diuj ga,
Swz lumj naeuz duzma,
Byaj gvaq bya gvaq rungh.

Sai:

Gungcanjdangj daeuj goq,
Byajloh diuzdiuz bingz,
Ngoenz baedauq Namzningz,
Gvaq ringz mbouj caengz haemh.

Mbwk:

Gaiq rap youq gwnz mbaq,
Vaq ga hwnj ga roengz,
Byaj geijcib leix roen,
Cij ndaej doeng daihloh.

Sai:

Dawzrap mbouj byajdin,
Seiz ninz hix miz ceh,
Mbouj dwg vah lgwngyez,
Ceh baedauq fuengbienh.

Mbwk:

Gaxgonq caen daih yoq(ca),
Suenqsoq daep hofhwngz,
Ukgiaeuj ngeixfwngfwng,
Yungh hofhwngz guh maenh.

Sai:

Seiz yungh gisongi,
Didi suenq cungj vaiq,
Dawz byaek bae haw baij,
Hix daiq aen de riengz.

Mbwk:

Gaxgonq caen daih yoq(ca),
Hoj daenj caiq hoj gwn,
Suenqsoq daep hofhwngz,
Ukgiaeuj mwnhsaesae.

Sai:

Seiz raeuz yungh soujgih,
Raen gjj ndei lailai,
Boux bae cawx bae gai,
Hai aen de bangcoh.

Mbwk:

Banneix seizdaih moq,
Gizgiz doq bienq ndei.
Daengz bouxmanh bouxhei(haw),
Gyaejvaj meiz(miz) soujgih.

Sai:

Boux lwg youq gwnz ceh,

Bouxmeh youq ndaw naz,
Miz saeh yaek doxra,
Vah ndaej doeng baedauq.

Mbwk:

Gaxgonq yaek doeng vah,
Ndaenq cienz mbouj gvaqbae,
Bingh yaek goenq hozsae,
Dai bae vunz mbouj rox.

Sai:

Soujgih youq lajvad,
Gvaq gizlawz hix raen,
Ndaw daeh raeuz miz ngaenz,
Ciengx aen de hix heih.

Mbwk:

Gaxgonq raeuz seng lwg,
Dwg yahgeq daeuj bang,
Bouxlwg seng ok ndang,
Meh sing sang mbouj ok.

Sai:

Seizneix raeuz seng lwg,
Dwg bae daengz yihyen,
Canghyw youq bangxhenz,
Raeuz mbouj gen mbouj heiq.

Mbwk:

Gaxgonq boh baenz bingh,
Yaek ce mingh gwnz sangz,
Mbouj miz ngaenz gwnz ndang,
Baenz fangz hix fouzfap.

Sai:

Seizneix miz yihbauj,
Laux nyaeq bingh mbouj you,
Miz quekgya bang raeuz,
Mbouj you gwn you bingh.

Mbwk:

Ngoenzneix daeuj guh fwen,
Dwen raen maz cix gangj,
Dungxsaw gou mbouj gvangq,
Gangj mbouj deng gaej riu.

Sai:

Ngeix maz cix gangj maz,
Ra roen mbouj raen rag,
Gij gwn dou couh ak,
Cak(cauh) fwen cix mbouj baenz.

Mbwk:

Ngoenzneix daeuj guh fwen,
Dwen gjj haemz gjj hoj,
Mbouj gangj vunz mbouj rox,
Ciuhboh caen dwgengz.

Sai:

Ngoenzneix daeuj guh fwen,
Dwen gjj ndei mbouj caen,
Miz gwn caiq miz daenj,
Ciuhneix maenh' ak lai.

Mbwk:

Ma iek maij gwn nyeq(noh),
Vunzgeq maij eu fwen,
Ngoenzneix raeuz simvuen,
Fwen ngoenz laep ngoenz haemh.

Sai:

Ma iek maij gwn nyeq,
Vunzgeq maij vuenyungz,
Ciuhvunz baenzneix hung,
Aeu vuenyungz gvaq ciuh.